

दिनांक 22.05.2025

समय: 19.34 बजे

आकाशवाणी जयपुर—अजमेर
प्रादेशिक समाचार

- प्रधानमंत्री नरेन्द्र मोदी बीकानेर कने पलाना मांय व्ही जनसभा मांय पाकिस्तान ने भारत मांय कर्या जावण वाळा हर आतंकी हमला री कीमत चुकावण सारु चेतायो।
- प्रधानमंत्री 26 हजार करोड़ रुपया री परियोजनावां रा काम री नींव रखी अर पूरा व्हा कामां रो उद्घाटन कीनो—एक सौ ऊं बत्ता और बेहतर बणायी ज्या अमृत टेशन देश ने संप्या।
- राजस्थान माध्यमिक शिक्षा बोर्ड कानी ऊं लीरीजी 12वीं कक्षा री परीक्षा रा नतीजा रो ऐलाण कीनो—टाबरियां बाजी मारी।

अर

- प्रदेश मांय ज़ोरदार गर्मी रो दौर जारी—आतूणी ज़िलां मांय जिन्दगी माथे घणो असर पड़्यो।

प्रधानमंत्री नरेंद्र मोदी कह्यो है के देश माथे व्हेवण वाळा हर आतंकी हमला री पाकिस्तान ने कीमत चुकाणी पड़ेला। वे आज बीकानेर कने पलाना मांय राख्यी ज्यी जनसभा मांय 26 हजार करोड़ रुपया रा खर्च वाळी न्यारी—न्यारी परियोजनावां रा काम री नींव रखण अर पूरा व्हा कामां रो उद्घाटन कर्यां पाछे बोल रह्या हा। श्री मोदी कह्यो के पाकिस्तान भारत ऊं कदे ई सीधी लड़ाई मांय जीत हासिल नी कर सक्यो, ई कारण वो आतंकवाद ने भारत रे खिलाफ लड़ाई रो हथियार बणायो। प्रधानमंत्री कह्यो के ओ बर्दाश्त नी कर्यो जावेला।

श्री मोदी कह्यो के पाकिस्तान सागे अब न तो कारोबार न ही बातचीत करी जावेला। प्रधानमंत्री कह्यो के ओ भारत रो संकल्प है अर दुनिया री कोई ताकत म्हां ने ई संकल्प ऊं नी डिगा सके है। श्री मोदी पहलगाम रा वाकया रो जिकर करता थकां कह्यो के 22 तारीख रा हमला रा जवाब मांय भारत री फौज 22 मिनट मांय आंतकियां रा 9 सब ऊं मोटा ठिकाणा तबाह कर दीना। वे कह्यो के दुनिया अर देश रा दुश्मन ई देख लीनो है के जद सिंदूर, बारूद बण जावे है तो वां रो कांई नतीजो व्हे है।

.....
प्रधानमंत्री कह्यो के विकसित भारत बणावण सारु देश मांय बुनियादी ढांचा ने और बेहतर बणावण सारु काम चाल रह्यो है। वे कह्यो के देश रा रेलवे टेशनां, हाई—वे अर हवाई अड्डां माथे नुवा ज़माना रा सुबीता मुहैया करावण सारु तेज़ी ऊं काम कर्यो जा रह्यो है। रेलों रा नुवा नेटवर्क रो जिक्र करता थकां श्री मोदी कह्यो के रेलवे ऊं जुड़्या बुनियादी ढांचा ने और बेहतर बणावण सारु नुवी गति दी जा रही है। श्री मोदी कह्यो के देश मांय एक सौ ऊं बत्ता अमृत टेशन विकसित कर्या जा चुक्या है, ज्यां माथे विकास सागे विरासत रो अनोखो मेल निजर आवेला।

.....
प्रधानमंत्री बीकानेर रा महाराजा गंगा सिंह ने याद करता थकां कह्यो के रेत रा मैदान मांय हरियाली लावण वाळा प्रदेश री जनता पाणी रो महत्त्व जाणे है। श्री मोदी पार्वती,

कालीसिंध-चम्बल लिंक परियोजना रो जिक करता थकां कह्यो के इण ऊं राजस्थान रा केई जिलां री धरती अर किसानां ने फायदो व्हेला।

प्रधानमंत्री पांच साल पैली चूरी मांय व्ही जनसभा ने याद करता थकां कह्यो के पाकिस्तान रा बालाकोट मांय भारत कानी ऊं करी ज्यी एयर स्ट्राइक पाछे ई वां री पहली जनसभा राजस्थान मांय ई व्ही ही। कार्यक्रम मांय राज्यपाल हरिभाऊ बागडे, मुख्यमंत्री भजन लाल शर्मा, केन्द्रीय मंत्री अर्जुनराम मेघवाल अर अश्विनी वैष्णव, उपमुख्यमंत्री दीया कुमारी अर डॉ. प्रेमचन्द बैरवा समेत राज्य मंत्रिमण्डल रा सदस्य अर जनता रा केई नुमाइन्दा ई मौजूद रह्या। इण ऊं पैली प्रधानमंत्री देशनोक रा करणी माता मिन्दर मांय पूजा-अर्चना कीनी।

000

प्रधानमंत्री देशभर मांय और बेहतर बणायी ज्या 103 रेलवे टेशनां रो देशनोक रेलवे टेशन ऊं उद्घाटन कीनो। प्रधानमंत्री ज्यां टेशनां रो उद्घाटन कीनो वां मांय प्रदेश रा बूंदी, मांडलगढ़, गोगामेड़ी, गोविंदगढ़, मंडावर-महुआ रोड़, फतेहपुर शेखावाटी अर राजगढ़ ई शामिल है। प्रधानमंत्री राज्य मांय बुनियादी ढांचा, कनेक्टिविटी, बिजली री पूर्ति, स्वास्थ्य सेवा अर पाणी री उपलब्धता बधावण सारु राज्य सरकार की 25 खास परियोजनावां री नींव रखी अर उद्घाटन कीनो। और ब्यौरो म्हाणा खबरनवीस ऊं-

000

ऑपरेशन सिंदूर रा तैत भारत री फौज कानी ऊं करी ज्यी कार्रवाई रो मान करण सारु राज्य मांय न्यारी-न्यारी ठौड़ां आज ई केई कार्यक्रम राख्यी ज्या। सरहदी जिला बाड़मेर मांय निकाळी ज्यी तिरंगा यात्रा मांय मोटी तादाद मांय पैली वाळा फौजी, न्यारा-न्यारा संगठनां रा नुमाइन्दा, जनता अर भाजपा रा कार्यकर्ता सिरकत कीनी। बालोतरा जिला रा सिणधरी मांय ई तिरंगा रैली निकाळी ज्यी, जिण मांय जनता सागे राज्यमंत्री के.के. बिश्नोई ई शामिल व्ह्या। करौली मांय माथुर स्टेडियम ऊं पुरानी कलेक्ट्री चौराहा ताई निकाळी ज्यी तिरंगा यात्रा मांय भारत माता री जय रा नारा लगायी ज्या। लोग ई ऑपरेशन सिंदूर माथे खुशी जता रह्या है। रिटायर्ड मेजर जनरल आलोक राज ई वां री भावना बतायी।

000

राजस्थान माध्यमिक शिक्षा बोर्ड ई साल लीरीजी 12वीं कक्षा री परीक्षा रा नतीजा रो आज ऐलाण कर दीनो। शिक्षा मंत्री मदन दिलावर नागौर ऊं ऑन लाइन तरीका ऊं नतीजा रो ऐलाण कीनो। कला संकाय मांय 97 दशमलव 78 फीसदी, विज्ञान मांय 98 दशमलव 43 अर वाणिज्य संकाय मांय 99 फीसदी विद्यार्थी पास व्हे गया। बोर्ड वरिष्ठ उपाध्याय परीक्षा रा नतीजा रो ई ऐलाण कर दीनो है। आज ऐलाण करी ज्या नतीजां मांय टाबरियां ओजू तीन ई संकायां मांय आगे रही। शिक्षा मंत्री विद्यार्थियां ने बधाई देता थकां वां ने आगे ई करड़ी मेहनत करण री राय दीनी।

ई मौके बोर्ड रा अजमेर दफ्तर मांय बोर्ड रा प्रशासक अर संभागीय आयुक्त महेश चंद्र शर्मा अर सचिव कैलाश चंद्र शर्मा समेत बोर्ड रा केई अहलकार मौजूद रह्या।

000

प्रदेश मांय जबरदस्त तावड़ो पड़ रह्यो है। उत्तराद-आतूणी हलका रा सरहदी जिला मांय चढ़ता पारा अर लू रे कारण जिन्दगी माथे घणो असर पड़ रह्यो है। श्रीगंगानगर मांय लारला चौबीस घंटां मांय पारो 47 डिग्री सेल्सियस ने पार कर गयो। जिला प्रशासन री ओर ऊं सड़कां माथे पाणी रो छिडकाव करायो जा रह्यो है। बीकानेर मांय 46 दशमलव 6 अर चूरु अर जैसलमेर मांय 46 डिग्री सेल्सियस तापमान दर्ज करी ज्यो। बाड़मेर, जैसलमेर, जोधपुर अर भीलवाड़ा समेत न्यारा-न्यारा

हलका मांय ई आखा दिन ज़ोरदार तावड़ो पड़्यो। अलवर मांय लारला चौबीस घंटां रे दौरान पारो एक डिग्री चढ़ ग्यो, ज्यीं कारण दिन सागे रात मांय ई लू रो असर रह्यो। वटे रा जिला अस्पताल मांय लारला पांच दिन मांय सूरज री तपिश रे कारण चमड़ी लाल व्हे जावण रा 50 ऊं बत्ता मरीज पूग्या। राजधानी जयपुर समेत राज्य रा ऊगणी हलका मांय ई आखा दिन तेज़ तावड़ो रह्यो।

दूजी कानी दौसा अर आरे-सारे रा हलकां मांय दोपहरां पाछे मौसम पलट ग्यो। दौसा शहर मांय कटे-कटे ओळा पड़्यो। चित्तोडगढ़ मांय सिंज्यां री पोर तेज़ अंधड़ सागे बिरखा व्ही।

000